

# Eta macartane ema Apóstole Pablo mayehe ema machamuri Timoteo, ticaijare

## 1 TIMOTEO

---

**1** <sup>1</sup>Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenehi viyehe, émapa ema Viáquenu Jesucristo, ema vicunequenehi eta mápechiravayare tichava. <sup>2</sup>Nímiamareca eta juca nucartane piyeho piti nuparape Timoteo. Némunacavihi tímicutijiricavahi nuchichavinahíni táichavénehi eta péhisiranuhi eta nusuapajiraivahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Náijaracavini eta táurivaina eta pipanereruana.

### Ema Pablo mameetaca ema Timoteo eta macunerayare ena tihapapirahiana

<sup>3</sup>Pécharipahi eta juca numetaruvihi, te nuyanayarepa tayehe te tinapaica eta Macedonia, eta nutuparasiravihi pinasayaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca. <sup>4</sup>Pécaticacaicha ena vichamurianahi, vahi nacusuapa eta echájirirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisiha ena viáchucanaveanaini. Eta juca náechajiriruvanahi, ticauyayacarehi táemejecapavachavaca ena vichamuriana, machu nachavacuejechava táicha. Étavanerecáiñahipucáini náimicatacahávihipucáini eta vítauchiráinahini eta véhisirahi ema Viya. <sup>5</sup>Nutuparacavihi taicha nuvarahahi náimerecaya ena vichamuriana yátupina eta náemunasiracacaina táuchurenavare te nasamureana, tapachinavarení eta napanereruana. Tacuija nacúquichiraváinahíni eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa. <sup>6</sup>Taicha nararihi ena téjecapavanapaipa,

nasuaparichucha eta tájiparacana súnsurupiana. Eta juca táiminajica-vacapaipa tayeha eta vímiturapiana. <sup>7</sup>Tásicha, tépiyacavanapa námatihi tamutu eta Sagrada Escritura. Navarahavare tímiturecana, váhisera nácautiarahíni eta tacayemaqueana eta táchajisihaqueneanahi. Ena nacahehi: “Víti véchahi tamutu”, tájinanéni náechihahíni.

<sup>8</sup>Tájina táichava eta tatarihirahi eta mavanairipianahi ema víyarahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejecapava. <sup>9</sup>Taicha véchahi eta tacaematanesirahi eta vanairipiana eta táimitupiruchiravacaya ena ticapecaturarahiana. Nácani achaneana tiúriana, vahi énaina tatuparaca eta vanairipianahi. Tatuparacahisera ena nácani mapicauruirahana masuapajirairahana; énapa nácani váinarajipanerérhana ticapecaturarahiana; énapa nácani mapicaucharahana ema Viya, ena ticatichana eta máechajiruvána; énapa nácani téhana ena náiyana, ena náenana; énapa nácani ticapahiana; <sup>10</sup>énapa ena túhusiana énapa nácani ticaecahiana ena nayenana, navehapa esu apana esena; énapa nácani tivehana ena nacutiqueneanahi ajaira; énapa nácani tiámercicana achane, amaperupuca, esenapuca; énapa ena tépiyahirahiana; énapa ena tépiyaequenerahiána. Énerichuvare eta vanairipi tatuparaca ena ticatichana eta táuriqueneana vímiturapiana. <sup>11</sup>Taicha nútii nutuparacasisvahi me Viya eta nímituresiraya eta táurinaqueneanahi máechajiruvana, eta tímicaijuhechahaviya tayeha eta táurinaquene mávasa ema Viya. Tétavicavahi eta macunachacarevahí éma.

### **Ema Pablo mahasulupayacha ema Jesucristo taicha eta máichuirahí**

<sup>12</sup>Núti nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítoucherayarehi eta nutuparacasisvayarehi mayehe. <sup>13</sup>Éma, tituparacanuhi eta juca, ichapemurihinéni eta néjecapiravahi mayehe, tíñemahihi eta néchajiruvanahi mayehe. Nupanajiricavacahi ena náinapureanahi téhicanahi éma. Tijapanunuhisera éma, vuíchahahinéni nusuaphahini néhicahini éma. Taicha vahi néchahahini émahinénipuca nucatianacahi, eta níchirahi ena machanerana éma. <sup>14</sup>Tásicasera tétavicavahi eta máemunasiranuhi ema Viáquenu Jesucristo. Ichaperinehi eta máijarasiranuhi eta nusuapirahi yátupi éma, étapa eta máijarasiranuhi eta némunaraivahi.

<sup>15</sup>Nuvaraha námutuhini ena achaneana nasuapa eta véhiruhi taicha yátupihi eta juca vímiturapiana: Ema Viáquenu Jesucristo tímitecahi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanaváinihi eta nucapecaturaraiváinihi. <sup>16</sup>Émasera ema Viáquenu Jesucristo tijapanunuhi, táitusiava tíchuhuanuhi nútii. Taicha mavarahahi máimerecayare ichape eta mayehe paciencia eta nuyehe, nuvayurevaquenénihi eta nucapecaturaráivainihi. Eta tacahe, nucautiarapa eta majacapirayareva namutu ena tisuapanayare, máichecuaraquirénapa eta náitaresiraya máicha.

<sup>17</sup>Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenehi, máepenacacahivare. Jéhevarequene éma, viyehehi Rey acanequene te tépanavainapa, étapa puiti juca vicaijuheyare. Amén.

### **Ema Pablo matuparacahi ema Timoteo**

<sup>18</sup>Nuchicha Timoteo, nutuparacavicha muraca eta piratahairaina picanara eta tamauriqueneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrivahi ena vichamuriana mameetaranahí ema Espíritu Santo. Vahi picuemepurureca. <sup>19</sup>Taicha nararihi ena ticainajiruvanapaipa, náechahinéni eta táñehivahi eta náichaqueneanahí, válisera návarahahini nácainajiruvahini eta tamauriqueneanahí. Tínajicavanarichucha eta náehisirainihi ema Viya. <sup>20</sup>Émaripa ema Himeneo émapa ema Alejandro, tacahehi eta náinajisiravahí eta náehisirainihi ema Viya. Puítisera, ena nani níjararupa ema Satanás, taicha nuvaraha nachava, náinajicayare eta nacaerahirahí ema Viya.

### **Ema Pablo máimituca eta nayujarauchiravaya**

**2** <sup>1</sup>Tativayaresera nutuparacache, vahi tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana. <sup>2</sup>Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajirisiraina eta avasareana, válhini vicuimahaini eta táñehiqueneana. Víti vímiyanovahini víurihini te mamirahu ema Viya, vicapicahuhini nayehe ena achaneana. <sup>3</sup>Taicha ema Viya Macatiurahiquene máuricahi eta víchirahi víti eta júcana. <sup>4</sup>Taicha mavarahahi éma máimimatichayare namutu ena achaneana eta yátupiqueneana máechajiruvana apaesa náuchucuha éna apanava. <sup>5</sup>Taicha májina apanainahini ticatiuchavacaina éna, macarichu ema Tata Vicaiyaquene. Émapa ema Machicha ema achane Cristo Jesús, macarichuhi ema téchajurahi viyehe viti achaneana te mamirahu ema Tata Vicaiyaquene. Nájina apanaina téchajíúrahínahí viyehe. <sup>6</sup>Ema Viáquenu Jesucristo tíjaracavahi tépena taicha eta macuchucuirahaviya vimutu viti achaneana. Puítisera mavaraha máimimatichayare namutu eta juca arairuhi vímiturapiana. <sup>7</sup>Eta tacahehi, manerejirunuichuhi mayehenuhi apóstole, nucametarairuyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiruvana ema Viya. Nutupiruvahí nútì eti juca néchajisirahí, vahi népiyahiraivainahi.

### **Ema Pablo máimitucavaca eta náicharacavaya te náurujisiravana**

<sup>8</sup>Tiuri, nutuparacachevare pímitucavacavare ena vichamuriana eta juca apana: Tauri eti náurujisiravaina te nayujarasirana. Ena ajairana, vahi nacueñamavahini me Viya eti máitauchirayare eti nayasearuhi. Tátupiruvahini te

nasamureana. Vahi nacúsemamajuhehíni eta nayujarasirayarehi nacajapava-quichavapuca. <sup>9</sup>Énaripa ena esenana, táurihini eta nacamuirihairana. Vahi nacúyeheheácaicha eta nacamuirihairá. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyehhehecaháini eta oro, eta perla, eta tasivachaqueneana míriareana. <sup>10</sup>Étaripa náurinavahi yátupiquenéhi, eta náimeresiravaina eta yátupina náhisirahi ema Viya, náichirainavare eta táuriqueneanapa. <sup>11</sup>Énerichuvare, tiúriyare eta nasamararasira eta náimitucasivana. Vahi nacuácapaemarahi nácani tímítucanahi. <sup>12</sup>Énerichuvare ena esenana, vahi tatuparaca náimitucahíni ena víyarahanapa te víúrujisiravana, taicha vahi tatuparacahini náimiturecahíni éna. Nasamararacayarechucha eta náimitucasivana. <sup>13</sup>Taicha te máepiyacainapa ema Viya ena viáchucanaveánaini, tínapuca máepiyacahi ema Adan, téquenehapa esu Eva. <sup>14</sup>Váhivare émainahini ema Adan máinapucahini máquipaicavahíni. Ésuhi esu esena, tísapavahi mavayuaca ema Satanás. Eta suísapiravahi, tiáquipaicavanapa tayehe eta pecatu. <sup>15</sup>Tásicha, ticatajivainapa eta suínasirana. Puíticha tanasihi nayehe ena esenana. Tiúchucuhanayaresera, te náimiyanova náehica ema Jesús, étapa eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napanereruana.

**Tiúrianayarehi eta náitaresira nácani tatupararuuanayare  
eta avacurecacare pastorecare**

**3** <sup>1</sup>Étaripa eta juca evacureca pastorecare, puiti nutupiruva numetacahe. Te natarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tiúriana evacureca ticaijuhecare. <sup>2</sup>Tacamunuhisera mácani ticavacureya eta pastorecare, tájina matapiravainaya eta máitaresirahi, tacuia nacuyunaca ena achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitaresira, máitucahi tipanerereca. Mácani achanesamure tjacaparahi nayehe nácani tichimarachanaya. Mácani máituca tímítureca. <sup>3</sup>Mácani vahi tavayuaruina eta téracare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi. <sup>4</sup>Ticaiyacareyare te mapena. Máitucayare eta macajurusirayare ena machichananaveana, tisuapajirahianayare tipicaurahianayare máicha. <sup>5</sup>Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana. Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana. <sup>6</sup>Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji. <sup>7</sup>Énerichuvare tacamunuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

**Tiúrianayarehi eta náitaresira nácani tatupararuanayare  
eta avacurecacare ticaijare diácono**

<sup>8</sup>Énerichuvare, nácani ticavacureya eta diáconocare, tacamunuhi ticapicahuayanayare eta náitaresirahi. Vahi apipiemanaaimahi eta náechajirisiravana. Váhivare ticavaharasianaimahi. Váhivare tijamurarahianaimahi. <sup>9</sup>Tacamunuhivare náimatiyare yátupi eta tisuapacareanahi mayehe ema Jesú, náitauchiraripa tamutu, tájinapa náichiravaimahi te mamirahu ema Viya. <sup>10</sup>Nacasamairunumaya te yátupihipuca tiuri, tájinapuca náichiravaimahi. Téhesera tiúrianahi, énara tuparairucana-yarehi eta evacuteca diáconocare.

<sup>11</sup>Énerichuvare, ena esenana, tacamunuhi ticapicahuana. Vahi nacuechajíhi. Súcani tijaneacavahi eta suítaresira. Tájina náichiravaimahi, titaurahiánayare.

<sup>12</sup>Ema tuparairucayare, tacamunuhi mácani ésunarichuvare esu mayena. Máitucayare eta máimitusirayare ena machichanaveana. Ticaiyacareyare te mapena. <sup>13</sup>Taicha te náitauchahai tamutu eta natuparahana ena tuparairucana, ticunachacareanahi tipícauchacareánahivare. Tásicha, énerichuvare tétumesamúrechaváinapa eta nacometarairuirahi eta máimiturapiana ema Jesucristo.

**Jéhevare eta juca téhicacare**

<sup>14-15</sup>Puiti nucunevaipa eta nítecapirovanyeta etara piyehe, téhesera vuíchahapuca nucuitujicava níteca. Nucajurevhisereta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecahi yátupi eta máechajiriruvana. <sup>16</sup>Taicha eta juca véhiruhi vimutu, téavicavahi eta táuriva:

Vimutuhi visuapahi eta máucupaisirahi te juca apaquehe ema Jesucristo, macaqueherahai eta juca viáquehehi viti achaneana. Émaripa ema Espíritu Santo macometarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari. Te tamutupa, tichavapa éma te mávasa anuma.

Tásicha, viti mavanarana véchajisihahi tamutu avasareana eta macuchucuirahavyare vimutu viti achaneana.

Ichapemuriana ena ticasíñavanahi mayehe, téhicanahi éma.

**Natiarihiyare ena tínajicavanaya eta náehisira ema Jesú**

**4** <sup>1</sup>Eta mameparapi ema Espíritu Santo, puiti juca vicaijuheyare, natiarihinapa ena timútserahávanayarepahi tínajicavana eta náehisirahi ema Jesú. Nasuapainapaipa ena tiyururahiana. Náehicainapa eta náimiturapiana

ena éreanana. <sup>2</sup>Nasapihainapa tisamacareanayare ena apipiemaná tépiyahirahiana. Ena nani, máimatiacavarahánahi eta náepiyahiraivana taicha náitunaipahi eta nacahirana. <sup>3</sup>Ena nani achaneana nayurucainapaipa ena vichamuriana. Ánipa nacaheyare: “Vahi táurica vitanucalahini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Vihasulupayachayarehi te vinicayare eta máijararuhavianahí ema Viya. <sup>4-5</sup>Taicha tamutuhi tiuri eta máepiyaruana ema Viya. Vahi táuricahímí vépuruhímí. Vijacapayarehi tamutu, vihasulupayachayarehi te vinicaya; taicha víjaracasihí mayehe ema Viya, timetacahavihi eta táurivahi. Tacaurisamurechahi ema Viya eta viyujarasirana. Puíticha tanasihi viyehe víti. Te vinica, vihasulupayachayarehi ema Viya.

### Ema yátupiquene mavanara ema Jesucristo

<sup>6</sup>Te pímitucavaca eta juca ena vichamuriana, pímerecahi eta yátupirahi mavanaravi ema Jesucristo. Eta juca táurinaquenehi echájirirucava, étarichuhi eta vímiturapianahí eta piyehe, éta tétumechaviyare eta pímiyaniravahí pisuapa eta juca véhiruhi. <sup>7</sup>Váhisera picusuapavaca ena nani tíchanahí eta juca echájirirucavana tamauriqueneana. Súnsurupianachucha éta. Pímiyanavasera picaravahu eta piúrítaresiráina mayehe ema Viya. <sup>8-10</sup>Tacuti eta náimicaravahuchirava ena ticavijarurahiana eta pelota, navaraha náetumecha eta náqueheana. Tacamunuhisera nápepejiricava te sácheana. Píti, vahi tacuechuquiha eta picaravahuirahi. Te yátupihi vicaravahu viúrítaresiraya mayehe ema Viya, tétavicavaya eta viúrivaya eta visamiravaya puiti juca vicahéhi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúrítaresira eta mayehe. Vímiyanavachucha vímitucavaca ena achaneana apaesa náurítaresira éna apanava mayehe ema Viya. Taicha yátupiquene eta echájirirucava ani tacahe:

Ema vicasínaquenehi, éma yátupiquenehi Viya.

Éma, téchahavi vimutu viti achaneana.

Vivetiji viti véhicanaripa éma,  
tétavicavahi eta macatiuchirahavipahi.

<sup>11</sup>Ena pímitureanaya, pituparacavacaicha muraca eta júcana.

<sup>12</sup>Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúriva apaesa étaina náehicávi ena vichamuriana. Tauri eta péchajisiráina. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena apamuriana achaneana. Yátupina eta péhisirahi, étapa eta picasiñavairahi mayehe ema Viáquenu. <sup>13</sup>Te vuíchahapuca nucuitecapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuinayare eta Sagrada Escritura apaesa nasama namutu. <sup>14</sup>Pémecha-

vayare eta nametarapianahi ena víyarahana mametaranahí ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepurureca eta péchemaraivahi maicha ema Viya.

<sup>15</sup>Pipanerecha yátupina eta juca pimetacasivanahi. Pímereca eta taurivahi eta péhisirahi, apaesa náimaha namutu eta piúrváinapaicha. <sup>16</sup>Péchapavaicha yátupina eta pímituresirahi eta juca véhiruhi. Pítijiva pipamicava pítouchayare tamutu. Te pítoucha eta juca, picuchucuhavayare píti, énapa ena pímitureanahi.

### Vímerecayare eta viúrivayare nayehe ena vichamuriana

**5** <sup>1</sup>Te natariihinapuca náejecapava ena víyarahana ichavicapananahí piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijiana ajairana, tauri eta piconsejachirvacáina tácuti eta péchajisira ena pichuquiqueneana. <sup>2</sup>Énerichuvare ena vénarahana ichavicapananahí piyehe, te náejecapavapuca, piconsejachavaca tauri tácuti eta péchajisira esu ticachichavi. Énapa ena amaperuana esenana, piconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

<sup>3</sup>Pímicatacavacaya ena tépenaimanahí, nácani tájinahí naviyavahini, yátupihi eta nacamunuiravana. <sup>4</sup>Téheserapuca natarihihi ena suchichanaveana esu tépenaimahi, suámarianapuca, énapa titátianayarehi. Ticaravahuanainapa eta náitájjirísiravaya. Títsirijicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsrijisiraváina eta nacajurusira ena ticachichana. <sup>5</sup>Pímicatacayaresera súcandi tépenaimahi sucarichuhipuca, nájina suchichainahí, nájinavare suviyavahi. Sucuchapainapa eta tásishaqueneya mayehe ema Viya, taicha suíjararuvaipa yátupi eta mayehe. Tiyujaracainapa tamutu sácheana, tamutu yátiana. <sup>6</sup>Ésusera súcandi suícutichiravahi suicha eta suvarahaqueneanahí, ésu tímicutijiricavaipa suáquijiruvahi eta mayehe ema Viya. <sup>7</sup>Pímitucavacayare ena tépenaimanahí, apaesa táuri eta nacaematanearaina ema Viya, tacuija natapiravaina. <sup>8</sup>Taicha ena vichamuriana, tatuparacavacahi náeñamavayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitauchahini eta náehisirahí ema Viya. Tiápajucavapanapa éma eta nayehe ena masuápajirairahánahí.

<sup>9</sup>Nacarichu pinacayare te nalista ena tépenaimana ena ticayeheanaripa sesenta año eta nañañora. Súcandi émanarichuhi ema suímaini eta suítaresirahi. <sup>10</sup>Ésupa súcandi tímaticarehi eta taurivanahí eta suématanerepiana. Súcandi tiúrihi eta sucajurusirahi ena suchichanaveana. Súcandi tijacaparahi te supena nayehe nácani tichimarachanapahi. Súcandi tiuri eta suéchapajirísira ena vichamuriana. Súcandi téchapajirahi nayehe nácani ticatajivanahí ticajumanahí, ticatiruhanahí. Súcandi tamutuhi suítaparaha suicha eta táriqueneana.

<sup>11</sup> Énasera ena tépenaimanahi amaperuanarichaha, vahi picunaca te lista. Tijuricati tiáquipaicavana taicha tavayuacavacarichaha eta tájiparacana, natanucarichaha ema ajaira, navarahaichaha tiápechavanayarehi ticaimana. Tijuricati ticainajiruana eta náehisirah ema Cristo. <sup>12</sup> Tacamitisicavacapáipa, énapa tímajicanapahi eta náehisirah ema Cristo. <sup>13</sup> Énerichuvare ticauya-yacarehi nayehe ena amaperuanarichaha, te pinaca eta te nalista, tijuricati tépiyacavanapa plújuana. Náematanepa tipaipiricana te pétiana, námapaipa eta cuéntoana. Tímisiáparacavánapáipa. Nacaemataneca náechajisihapáipa jácani náimahaqueneanapahi te pétiana. Vahi tácatuparaha náichahíni eta juca. <sup>14</sup> Eta tacáhe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana. <sup>15</sup> Taicha nararihi ena tépenaimanahi tínajicavanapaipa eta náehisirah ema Jesús, náehicapa ema Satanás.

<sup>16</sup> Te sutiarihihipuca tépenaimahi esu vichamurihi, te natiarihivarepuca ena sujaneanahi vichamurianahivare, ena titátianayarehi ena sujaneananarichu; apaesa vahi succuapitavairicahi nayehe ena máimaruhanahi titájiríruanahi, táchavenehisera jácani tamajinairahi naviyahini éna.

### **Tatuparacavacahí ena vichamuriana náimicatacayare ena pastoreana eta náitápiravahí**

<sup>17</sup> Ena pastoreana, te tiúrihipuca eta náechapajirisiravaca ena vichamuriana, ichapeyare eta náemunacacarevayarehi. Tatuparacavacahí ena vichamuriana náimicatacayare tayehe eta nanicaquenerepi ena pastoreana, taicha éna, eta náematanerepihi tímiturecanahi ticametarairuanahi. <sup>18</sup> Taicha ani tacáhehi eta Sagrada Escritura: “Vahi picuitisumucha eta pivuiyera te ticaematanepahi taicha técuhapahi”. Ánivare tacáhe: “Ema achane ticaematanehi, tatuparacahi ticavachayarehi mayehe ema macaematanearuhi”.

<sup>19</sup> Vahi picusuapavane te tatiarihinapuca eta máepiyaequenena mácani náiyacarahi ena vichamuriana. Téhesera natiarihinapuca ena apinana, mapananapuca tinecapaequenehanahi eta máejecapiravahi, jéhesare tisuapacare éta. <sup>20</sup> Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsiriha napica ena apamuriana, vaipa nacuquicha eta juca.

<sup>21</sup> Nutuparacavicha muraca, pítachayare yátupina eta juca numetarapianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahí mácani téjecapavahi, taicha máimrararacahi ema Tata Vicaiyuquene, émapa ema Viáquenu Jesucristo, énapa ena mayeheana ángeleana manerejiruanahi.

<sup>22</sup> Te matiarihinapuca mácani navaraha nacasiapa pastor, picasamairunumaya te tiúrihipuca éma. Vahi picuýahúcha picunacavane éma. Tijuricati tatiarihinapahi eta máejecapiravahi. Machu pítina tamuriaca taicha eta pímisipiraina éma. Pijaneacavaicha tayehe eta juca. <sup>23</sup> (Puiti néchavahi eta picajumamajipa

eta pítaresirahi te piami. Tásicha, nuconsejachavi: Pímisiriquicha apaesainarichu eta vino eta péresarama une, pípurujinahi.)<sup>24</sup> Tacamunuhisera eta picasamairunumaya nácani tisiapanayare eta pastorecare, taicha nararihi ena máchasihi eta napecaturana. Vahi táimaticarevane, tapaenumavaya picasamairunuma éna. Nararihisera ena ticaecheravane eta napecaturana. Tímaticareanavane. <sup>25</sup>Ene tacahehi, nararihi ena tímaticareanavanehi eta náichirahi eta táuriqueneanahi. Nararihivare ena tacamuñuhi eta picasamairunuma, apaesa ticaecheravanehi eta táuriqueneana náichaqueneanahi.

**6** <sup>1</sup>Ena vichamuriana mísuanahipuca, tatuparacavacahi napicauchayare ichape ena náquenuanahi. Vahi tijic平pairihianaimahi apaesa vahi nacuyunaca ena achaneana eta máijare ema Viya, váhivare nacucaeahi eta vímiturapiana. <sup>2</sup>Étaripa te nacaquenuhipuca mácani vichamurihi, tiápajucavayare eta napicauchirayare. Vahi tímipanavanáimahi eta nachamurirahi éma. Náimerecayare yátupi eta táurivaya eta náematananeana, taicha ema nacaemataneyeruhi, nachamurihi máemunaruvaré ema Viya.

### Ticurisamurechahavihi eta véhisira ema Jesús

Piti nuchicha Timoteo, pímitucayare tamutu eta juca nayehe ena vichamuriana. Pémechavacayare eta vímiturapiana. <sup>3</sup>Natiarihinapuca ena nácani navaraha tímiturecana eta apana doctrina. Nahapapicainapa eta vímiturapiana, tájinaserá vahi tavehapicaimahi eta juca yátupiqueneanahi tásichaqueneanahi mayehe ema Viáquenu Jesucristo. <sup>4</sup>Ena nani, ticasínaváicanahi, tájinahineni náitucaquenénahíni. Ena nani, náurica téchajicana. Navayurevanapahi nácapaemachapahi tayehe eta tacayemaqueneana eta vechajiriruvana te vímiturecahi. Ticapinarurahiana éna, tiúmeharahiana, táchanarahiana, tipícacarácavanapa. <sup>5</sup>Tamutu sácheana ticatianarerecana taicha máuripanererurahána ena, máimatinahanahí etá yátupiqueneana. Navaraha nacavacharapiyare etá nayehe religión. Piti vahi picupauchavaca ena nani.

<sup>6</sup>Jéhesareva, téavicava etá vitúricacareva máicha ema Viya, etá véhisirahí éma. Tavetiji te vicurisamurechava tayehe etá vicayehsequeneanahi máijarruhavianahí éma. <sup>7</sup>Taicha te viúchucapa suyehe esu ticachichahavi, tájina viámapahini vímahaquenenahíni. Ene tacaheyare etá vitávirayare, tájinavare viámaimahi etá vímahaqueneanahi. <sup>8</sup>Eta tacahe, te tatiarihipuca etá vinícaquenéna te vipenana, vicamuirihahipuca, tarataripa visuapayarehi. <sup>9</sup>Énasera nácani tipanerechanahi tirricuchavana, apanapanepa etá najamurachaqueneana. Tacananesircapa etá naplatanechiavaya. Énajivapa tímicoñacavana taicha etá najamuraraivana súnsurupianahi. Eta juca ticauyayacarehi étaiна támicoñaca etá náchanevana. <sup>10</sup>Táitsivahisera ena achaneana, náetaviuchahi etá tavayuasirahi náichapa tamutu etá tájiparacana, táchavenehi etá najamurachira etá plata. Namapurujipaipa ema vichamurianaini. Natiarihinapaipa timutserahavanapaipa etá tayurusiraina etá najamuraraivana. Tásapihapapuca

táiminajícapahi eta náehisirainihi ema Jesús. Énajivapa titanucavanahí eta naviurevahí, timutserahavanapaipa eta nacatajivairanahí eta náitaresiranahí.

### Yátupina eta véhisiraina ema Jesucristo

<sup>11</sup> Pítisera vahi picupanerecha eta juca mamavarahaqueneana ema Viya. Pérajicava tayehe, taicha mavanaraviripa éma. Tátupiruvahí eta pisamure mayehe éma. Táimiyanava eta juca táurivahí eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta pimansuvaina te pisamure. <sup>12</sup> Pétumechavachucha eta picaematañesirahi ema Viáquenu. Muracaina eta picasiñavaira mayehe. Vahi picuyacujequenehava eta picuchapirahi eta pítaresiraya máichecuaraquirreyare, taicha máichuhuquenevirichuhi ema Viya. Vahi picuemepurureca eta péchajiriruvanahí te namuri ena vichamuriana, te píjaracavainapa eta péhisirayare ema Viya.

<sup>13</sup> Puti, tímarracavihi ema Viya eta nutuparasiraviya. Éma, ticaitarecahi tamutu eta vímahaqueneanahí eta te juca apaquehe. Tímarracavahivare ema Viáquenu Jesucristo. Pécharichuhivare eta matupiruvairahi eta máimereuchi-ravahí éma te mamirahu ema Poncio Pilato. <sup>14</sup> Pítauchayare píti tamutu eta juca nuvanairipianahí taicha tásiqueneanahí me Viáquenu. Vahi pihapapí-caimahi, apaesa tacuña táimicajachavi mayehe. Tauri eta machimapiravina ema Viáquenu Jesucristo te máitecapa te táitauchavapa te jena sácheyare máicutiarahi ema Tata Vicaiyaquene. <sup>15</sup> Ichapenapa vicunachainapa ema Tata Vicaiyaquene taicha macarichuhi éma yátupiquenehí tamutu marataha. Émahi Réquenehí, Viáquenuquenehí. Tivanecahi namutu ena réyeana énapa ena aquenucana. <sup>16</sup> Macarichu éma, yátupiquenehí máepenacaca. Máetaviuchahi eta maváyuháuirávahí. Nájina tiratahaina ticachacayaina eta majaraiva tayehe eta mávihahi. Éma, nájina tímahaina, taicha máimahasiquenehí éma. Éma, vipicauchaquenehí vivapinaquenehí ichape. Máiitavacacainapa eta vicunachirayare éma. Jéhevare éma, tamutu marataha. Amén.

<sup>17</sup> Énerichuvare ena vichamurianahí ticaimahaqueneanahí rícuñanahí, pímitucavacayare eta vahi nacucajamurava. Váhivare nacucasiñava eta nacaimahaquenérahi, taicha tijuricati titava eta náimahaqueneanahí, témitiequenehapa tamutu. Nácasíñavasera mayehe ema Viya, jéhevarequene ema ticasíñacare. Éma tíjaracahavihi tamutu eta vicamu-nuqueneana, viúrisamurerecahi máicha. <sup>18</sup> Tacahé, ena vichamuriana rícuñanahí, pímitucavacaichavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunu-vanapahi. Tátupiruva te nasamure eta náijarasiraina ena ticamunu-vanahí. <sup>19</sup> Te yátupina náitaucha eta juca, tatiarihi eta sácheyare najacapiraya eta apanayare náimahaqueneanayare te anuma. Éna, ticaijaranainapa eta nápechiravaya titarecana, taicha éna yátupihi eta náimicatarávahí eta náitaresirahi te apaquehe. Máichecuaraquirénapa eta náuricacarevaya.

**Eta téqueneha matuparaha ema Timoteo**

20 Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani téchajisihana eta tájiparacana, técaticavánachucha. Váhivare picujicapa ena nácani navaraha ticanaraemachaviana. Ena nani tímijachavanahí náimatihíji eta táuriqueneana, tásihasera ichape nayerehi eta náehisirainahíni ema Viya. 21 Nararihipaipa ena vichamurianaini tínajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricacarevaya máicha.

Tamutupa eta néchajiruvahí piyehe.